

Cifra no ta locual cu a spera

Serlimar tin reto cu cumplimento di pago pa piki sushi

ORANJESTAD - Te na e momento aki Serlimar no ta cla pa loke ta cobransa na casnan pa pikimento di sushi, pero tur esaki tabata bisto pasobra e no ta un reto facil segun director di Serlimar Richard Fingal a splica. Tambe a puntra sr. Fingal den ki situacion Serlimar ta te cu awe mirando cu poco tempo pasa a confronta problema cu placa pa motibo cu gobierno no a cumpli y con ta para cu esaki si a cuminsa wak placa di gobierno. El a indica cu banda di e retonan Serlimar ta stabiel.

“Berdad cu a cuminsa e aña aki cu cobramiento pa pikimento di sushi di cas, unda cu a concentra hopi riba dunamento di servicio. Nos no por grita alehuya pasobra e situacion no ta locual a spera completamente. Nos no a spera 100% of 80%, nos a spera hopi menos cu esaki pasobra nos islanan ruman (Bonaire y Corsou) tambe a pasa den e cambio aki y nos sa kico nan a experiencia. Sinembargo ni esey (e cantidad spera) no a duna resultado, Sr. Fingal a bisa.

El a sigui bisa: “Si ta asina cu mas cu nos haci propaganda, mas nos ta den noticia, mas nos ta profila pafu y muestra un miho servicio, papia, yama y informa, nos ta wak mas y



mas cliente ta yega Serlimar si. Pues ta kere cu pa fin di aña por bisa algo mas positivo riba esaki.

Compania priva y ley

Na e compania priva cu tin actualmente pikiendo sushi, e ta asina cu si bo no page e no ta piki bo sushi. Sinembargo den e caso pa Serlimar ley ta papia otro. A puntra Sr. Fingal si kisas Serlimar lo mester bay haci algo tocante e ley pa esaki sostiene Serlimar tambe, el a bisa: “Berdad e ley ta bisa algo pero no sa si mester bay asina leu na haci cambio na ley. Locual cu si

nos ta bay haci cu ta regarda e servicio, nos ta bay duna hopi mas na e mesun prijs cu ta paga cu niun otro compania na Aruba lo no duna bo. Aworaki ta buscando cadaver, cacho morto, bestia morto na cas. Esunnan cu ta cliente di Serlimar no tabata cobra nada y aworaki tampoco ta cobrando extra pa esey. “Sinembargo esunnan cu ya no ta cliente di Serlimar, si nos ta bay cobra pa e servicio.”

Y asina ta bay tin mas cos cu hendenan cu no ta contribui na Serlimar lo no haya e servicio aki como cu nan ta

contribui na un otro compania. “Pues si bo kier servicio di otro y servicio adicional di Serlimar, lo bo mester paga pa esaki.” Esaki ta e reto cu Serlimar ta sigui cun’e den 2015. Den dado caso cu esaki no resulta, den 2016 mester bay wak kico mas mester wordo haci, Sr. Fingal a bisa.

Pago gobierno

Ultimo biaha cu tabatin accion tabata pasobra e suma cu tabatin mester pa yega full e salario a yega un tiki laat pero no tanto laat, pues un par di ora. Sr. Fingal a bisa cu e no sa pakico tabatin mester di tanto

beheit pa algo asina. Cualquier empresa grandi sa pasa den un situacion asina aki.

El a sigui bisa cu tur hende sa e situacion financiero di gobierno, tur hende sa e situacion financiero di caha di Aruba, kiermen esey tambe ta conta pa Serlimar. “Si gobierno tin problema hopi empresa na Aruba incluyendo Serlimar lo pasa den su dificultadnan, pero locual cu si Serlimar ta haciendo aworaki ta mucho mas negoshi cu normalmente. Cu e negoshinan aki ta purba di tapa e buracan cu tin of wanta e momento cu gobierno no a cumpli cu su parti. Tin sumanan ta yegando di gobierno pero no ta sumanan cu tin firma di acuerdo cu gobierno.

Compania stabiel

Finalizando Sr. Fingal a bisa Serlimar ta hopi stabiel contrario na algun su pensamiento. A papia cu diferente departamento recientemente unda cu personalmente nan a puntra con e personal ta. “Nunca un compania por haya 100% di personal bo tras esey ta un hecho. Semper lo tin hende cu nan mesun idea y opinion. Especialmente mirando unda cu e compania ta dirigiendo su mes cu e cliente ta na prome luga unda cu antes e empleado tabata na prome luga, Sr. Fingal a termina bisando. □